

PELAJAR 3

MENSIA ENGGAU SITAN

A. MENSIA- SEBAKA GAMAL TUHAN-DIGAGA AWAKKA BEKUASA

Tuhan bisi kebuah ti tetap lebuah Iya ngaga mensia (lelaki enggau indu). Iya bisi siti atur enggau tuju ti manah ka mensia. Laban Tuhan nya pengerindu, Iya deka meda utai idup ti nemu befikir enggau pengasai ati ti sama enggau Iya awakka Iya ulih meri pengidup Iya, semua perangai enggau semua utai ti dikemisi Iya, ti deka merintah langit enggau dunya begulai enggau Iya sebaka anak Iya. Nyadi Tuhan ngaga mensia – sebaka gamal Iya empu.

“Udah nya Allah Tala lalu bejaku munyi tu: ‘Diatu kitai deka ngaga mensia sebaka gamal kitai. Iya deka berkuasa atas ikan, atas burung, atas jelu tupi, atas jelu babas enggau atas utai ti ngerayap.’ Nya alai Allah Taala lalu ngaga mensia neladan gamal iya empu. Siko mensia nya lelaki lalu siko indu” (P-kal 1:26,27).

B. LUCIFER

Tuhan ngaga mayuh macam utai ti manah sebedau Iya ngaga langit enggau dunya. Entara utai nya ianya bala melikat-roh ti digaga awakka ngereja peneka Tuhan. Bala melikat nyembah Tuhan enggau ngereja peneka Iya enda kala badu (Pem 5:11-14). Taja pan pia, lebuah maya Lucifer, siko ari ketuai melikat, nemu tentang atur Tuhan ngaga mensia, dia iya lalu ringat ngagai Tuhan. Iya deka lebih berkuasa ari Tuhan ba Serega.

Lebuah maya Lucifer ngelaban Tuhan, Tuhan lalu muru iya ari Serega. Lebuah maya tu mega, sepertiga ari melikat ti di Serega setanah enggau Lucifer ngelaban Tuhan lalu semua sida diburu enggau iya (Pem 12:4).

“Rajah menua Babilon, bintang pagi ti manchar terang, nuan udah labuh ari langit! Dulu menya nuan ngalah ka mayuh bengkah bansa, tang diatu nuan udah labuh ka tanah. Nuan ingin deka niki ka serega, lalu nudok ka kerusi nuan ari atas bintang ti pemadu tinggi. Nuan ngumbai diri duduk baka rajah ba bukit di utara ti endur sida petara begelumu. Nuan ngumbai diri deka niki ngagai serega baka iya ti Pemadu Bekuasa” (Isa 14:12-14).

Lucifer dibuai ngagai dunya, endur iya dikumbai ‘Sitan’ tauka ‘Iblis’, ngejang ari mulia Tuhan ti pengaga semua utai, iya lenyau pemajik enggau api mulia ti dikembuan iya suba (Esk 28:11-17) lalu nyadi orang ti jai sereta penuh laban pemetang.

Bala melikat ti dibuai begulai enggau Lucifer mega diambil mulia sida lalu nyadi roh-roh jai ba dunya tu. Tang niat jai bala sitan enda kala berubah, nya alai enggau chara lain sida bekerja keras deka ngerampas Kerusi Penuduk Tuhan, sida bekerja keras ngelabuhka mensia ti udah digaga Tuhan.

C. PENGUJI

Tuhan meri kuasa ngagai lelaki enggau indu ti berubah ba dunya tu (Adam enggau Hawa) awakka bempu semua utai ti bisi ba dunya, enggau ngasuh seduai nyaga semua nya ari baruh kuasa Tuhan.

Kena Tuhan nyaga awakka seduai tetap likun ari kacau sitan enggau roh-roh jai, Tuhan nanam dua pun kayu spesil ba dalam taman endur Adam seduai Hawa diau. Tuhan ngaga nama ka kayu nya 'Pun Kayu Pengidup' enggau 'Pun Kayu Penemu' ti ngasuh ngelala semua utai. (Peda Pem 2:9,17).

Pun Kayu Pengidup ngelambangka Pengidup enggau Kuasa Tuhan – lalu enggau makai buah nya, Adam seduai Hawa deka diisi enggau mayuh agi pengering enggau pengerindu sereta mulia Tuhan.

Pun Kayu Penemu ti ngasuh ngelala semua utai ngelambangka idup enggau kuasa sitan, lalu seagi-agi Adam seduai Hawa enda makai buah kayu nya, seduai deka likun ari roh-roh jai ti bisi ba dunya tu. Kuasa atas semua utai ti udah digaga Tuhan tetap mengkang ba jari seduai lebu seduai ngasi ka jaku Tuhan ti Pengaga seduai (Heb 2:8).

“Udah Iya ngaga kebun di menua Eden, Tuhan Allah Taala lalu ngambi lelaki ti udah digaga iya, ngatur lelaki nya diau dia awak ka iya ngereja sereta ngintu kebun nya. Ko Iya orang enggau lelaki nya: “Nuan tau makai sebarang buah kayu dalam kebun tu, tang nuan anang sekali-kali makai buah kayu ti tau meri penemu kena ngelala semua utai. Enti nuan makai buah nya, nuan deka mati.” (P-kal 2:15-17).

Taja pen pia, Sitan ulih nipu Hawa. Iya madah ngagai Hawa pasal Pun Kayu ti meri Penemu nya enda jai – tang pun kayu nya tau ngasuh orang sebaka enggau Tuhan. Hawa pecaya ka jaku tipu sitan lalu makai buah kayu nya. Adam, taja pen iya nemu nya bula, tang iya makai buah ari Pun Kayu nya (1 Tim 2:14).

“Lebu indu nya meda gaya kayu nya, lalu belemati ka pemanah iya, dia iya lalu berunding ka penguntung enti iya bepenemu. Iya ngambi sekeda buah kayu nya lalu makai iya. Uдах nya iya mai buah nya ngagai laki iya, lalu laki nya mega makai buah nya” (P-kal 3:6).

D. BEKAU ARI DOSA

Berengkah ari dosa nya, mensia lenyau mulia enggau gamal Tuhan sereta kuasa ba utai ti udah digaga. Uдах nya Sitan ngambi kuasa ti udah ditinggalka Adam enggau Hawa lalu merintah dunya, lalu pemat ngemenuhka dunya (Heb 2:14,15).

“Dosa datai ka dalam dunya ulih siko mensia, lalu dosa iya mai pemat. Nya alai pemat ngerampit semua bansa mensia, laban semua mensia bela bedosa” (Rm 5:12).

Semua peturun ari Adam seduai Hawa udah nitih ka teladan ti bedosa. Semua mensia labuh dalam kuasa sitan.

“Dulu menya kita udah mati ba semangat, laban kita enda ngasi lalu bedosa. Lebu nya kita nitih ka jalai penyai dunya tu, kita ngasi ka pemerintah ti megai kuasa di dunya luar, iya nya antu ti bekuasa ba sida ti enda ngasi ka Allah Taala diatu. Dulu kitai udah baka sida, lalu diau nunda ka

gaya pengidup mensia ti bedosa ari asal, sereta nunda ka penginein tubuh enggau runding kitai empu. Baka genap iku orang bukai, kitai mega endang patut nat ka ukum Allah Taala” (Ep 2:1-3).

Dini-dini endur sida diau, ati orang diatu penuh ulih:

1. Nyembah Engkeramba

“Sida nemu pasal Allah Taala, tang sida enda meri iya basa ti endang enggi iya, lalu nadai mega sida meri terima kasih ngagai iya. Tang pikir sida nyau mapap, lalu ati sida penuh ulih pemetang. Sida ngumbai diri bisi penemu, tang sida beli: sida badu nyembah Allah Taala ti idup meruan, tang sida nyembah engkeramba ti baka gamal mensia, tauka burung, tauka jelu, tauka jelu ti ngerayap” (Rm 1:21-23).

2. Perangai Ti Jai

“Laban mensia beli baka nya, ari nya Allah Taala neju ka sida ngereja penyai enggau pengamah nitih ka peneka ati sida empu dalam kerja kamah ti ngasuh malu enggau diri sama diri. Utai ti bendar pasal Allah Taala diganti sida enggau utai ti bula; sida nyembah lalu betuai ka utai ti digaga Allah Taala, ukai nyembah iya ti Pengaga semua utai, iya ti patut dipuji belama-lama iya! Amin. Laban mensia ngereja pengawa ti baka nya, ari nya Allah Taala neju ka sida ngereja utai nitih ka penginein ti jai. Pia mega sida ti indu ngereja pengawa ti keji enggau diri sama indu. Baka nya mega lelaki enda beleman enggau indu nitih ka jalan jalai selama, tang sida beleman enggau diri ti sama lelaki. Mensia ngereja pengawa ti ngasuh malu enggau diri sama diri, nya alai ketegal nya sida kena ukum nitih ka penyalah sida empu” (Rm 1:24-27).

3. Macham-Macham Bansa Penyai

“Laban mensia enggai ngingat ka utai ti bendar pasal Allah Taala, ari nya iya neju ka sida megai runding ti jai, awak ka sida peneka ati ngereja utai ti enda patut digaga sida. Ati sida penuh laban penyalah, penyai, pengamu enggau ati ti begedi. Sida kepapas, bebunuh ka orang, belaya, ngakal enggau nganu orang. Sida orang ka orang, orang jai pasal pangan diri; sida begedi ka Allah Taala, ngemesai ka diri, sumbung enggau muji diri; sida berunding ka mayuh agi utai ti jai; sida enda ngasi ka apai indai sida; sida jai ulah; sida enda ingat ka semaya diri, lalu sida nadai ngayan ka penelap ati diri tauka nadai penyinu ka orang bukai. Sida nemu adat Allah Taala, madah ka sebarang orang ti baka nya patut kena ukum mati. Tang taja pia sida majak ngereja pengawa nya lalu sida mega setuju enggau orang bukai ti sama ngereja utai nya” (Rm 1:28-32).

E. ATUR TUHAN TI BESAI KENA NYELAMAT SERETA NGERAI

Tuhan enda kala ngelengka ka kitai mensia taja pen kitai mensia bedosa. Enda kala! Dataika Iya bisi siti atur ti besai – atur ti dikena Iya nyelamat ka mensia ari tanchang sitan lalu mai mensia pulai ngagai atur asal Iya, ianya mensia nyadi anak Tuhan sereta duduk enggau Iya ba kerusi Iya. Tuhan berengkah nyendia ka dunya kena nganti penatai Juruselamat-Jesus.

“Baka semua mensia ti enda tau enda mati ketegal kaul sida enggau Adam, baka nya semua deka di-angkat ka ari mati ketegal saum sida enggau Kristus” (1 Kor 15:22). Penyanggup Baru nulis pasal Kristus, Siko Orang ti deka datai nyelamat ka kitai ari dosa kitai.